

17 SEP 1996

ASW-Bumiputera

BUMIPUTERA MASIH KETINGGALAN DALAM PELABURAN UNIT ASW

KUALA LUMPUR, 17 Sept (Bernama) -- Sambutan golongan Bumiputera terhadap skim Amanah Saham Wawasan (ASW) masih jauh ketinggalan di belakang berbanding dengan bukan Bumiputera.

Menurut Presiden Gerakan Belia 4B, Datuk Mohd Ali Rustam, sehingga semalam Permodalan Nasional Berhad yang mengendalikan skim itu menerima pelaburan berjumlah RM15 juta dari 11,706 Bumiputera dibanding dengan RM625 juta dari sejumlah 218,836 pelabur bukan Bumiputera.

Beliau berkata demikian dalam majlis taklimat mengenai ASW bagi anggota-anggota Gerakan Belia 4B di sini hari ini. Teks ucapannya dibacakan oleh presiden (I) pergerakan itu, Datuk Zainol Md Isa.

Sehubungan itu beliau berkata pergerakan itu akan berusaha untuk menggalakkan lebih ramai anggotanya dan golongan Bumiputera amnya melabur dalam skim itu.

"Jumlah ahli pergerakan ini seramai 300 ribu orang dan sebahagian darinya adalah golongan belia dan 4B menyokong dasar kerajaan menggalakkan golongan belia menabung", tambahnya.

ASW yang dilancarkan oleh Perdana Menteri Datuk Seri Dr Mahathir Mohamad pada 28 Ogos lepas mula dijual pada 2 Sept dengan tawaran sebanyak 3 ribu juta unit. Sebanyak 51 peratus diperuntukkan untuk bumiputera dan 49 peratus untuk bukan bumiputera.

Dalam majlis itu Zainal juga menerima sebanyak 300 permohonan untuk menyertai skim itu dari semua cawangan pergerakan itu di seluruh negara --
BERNAMA

SBS WAT